

Sèn Jan/San Giovanni di Fassa, ai 7 de jené del 2023

## COMUNICAT STAMPA

En sabeda ai 14 de jené te **Chino Marmolèda a Cianacei** e en domenia ai 15 de jené del 2023 te **la Gran Ciasa a Soraga**

**Lis dal Vera.**

Prejentazion del liber te doi lengac (ladin-talian) “**Lis dal Vera**” e spetacol per ladin “**Do I vièl del saer – Lis dal Vera vel te dir vèlch**”

**Lis dal Vera** l é l titol del **dopie apuntament** che la **biblioteca del Istitut Cultural Ladin** ge sporc a duta la comunanza de Fascia.

Vegnarà prejentà l nef liber de la regoeta **Jent de Fascia**, **dedicà belapontin a Lis dal Vera** e portà sun paladina l **spetacol**, adatà per teater, «**Do I vièl del saer – Lis dal Vera vel te dir vèlch**», che l à abù gran ejit de setember de l an passà sal Vera.

L prum apuntament sarà en sabeda **ai 14 de jené** aló dal **Chino Marmolèda a Cianacei** e l secont en **domenia ai 15 de jené del 2023** aló da **la Gran Ciasa a Soraga, da mesa les nef.**

L **liber l é stat scrit** da la bibliotechèra del Istitut Cultural Ladin, **Alberta Rossi**, col contribut stilistich e linguistich de la diretora **Sabrina Rasom** e l didament de la familia de Lis.

Ne conta de chest **Alberta Rossi**, responsabola de la Biblioteca “Père Frumenzio Ghetta”: «Chela de Lis dal Vera l é la storia de na fascèna che la é stata duta sia vita te noscia piccola val, ge dajan valor a vigni dì. Crese che per nesc picoi letores posse esser n bon ejempie: percheche Lis fajea dut con gaissa, e soraldut percheche l’à semper abù gran respet per la besties, la natura e sie ritmes.

**l dessegnes** i é de la joena artista da Pancià, **Consuelo Bonet**, a chela che ge é stat dat l’enceria per fèr n studie spezfich sun co portèr dant e dessegnèr l personaje. L liber conta en curt, tres la paroles e i dessegnes, la vita de Lis e l é l frut de n **lurier condividù**, che à tout ite dantaldut la familia. Rengrazie dassen de cher duc chi che à colaborà».

**Sabrina Rasom** recorda che «ence Lis l é n ejempie de gaissa e amor per sia tera, che moscia la normalità de na identità che muda e che se adatea ai tempes. La Majon di Fascegn ge sporc a sia comunanza chest nef liber de la lingia “**Jent de Fascia**”, con chela de seghitèr a viventèr la voa de saer de noscia reijes a na vida scempia ma percacenta».

Ve speton de n muie donca, picoi e gregn, per recordèr Lis e per ge dèr luster a noscia reijes.

(AR/sr)